

«Gemeinsam en Grigioni»

Festa per promover la convivenza

■ **(anr/fa) È la convivenza da las trais culturas e linguas en Grischun in mitus u realitad? La festa «Gemeinsam en Grigioni» a Cazas vul vivifitgar la convivenza activa dals vischins en il chantun.** Quest onn festiveschan gist duas organisaziuns linguistic-culturalas dal Grischun in giubileum: La Walservereinigung Graubünden festivescha 50 onns e la Lia Rumantscha 90 onns. La terza organisaziun per lingua e cultura è la Pro Grigioni Italiano ch'exista dapi l'onn 1918. «Il Grischun vegn adina numnà model exemplaric per la convivenza da trais linguas e culturas», ha ditg *Urs Cadruvi*, il secretari general da la LR mardi a Cuira als represchentants dals meds da massa grischuns, «i dat però era grondas differenzas, organisond in inscunter cuminaivel vulain nus examinar quant gronda che l'encletga vicendaivla è per propi, cun la finamira da vivifitgar uschia la convivenza.» Causa che la Viafier retica nun enconuscha nagins cunfins linguistic-cultural e collia tut las regiuns dal Grischun ha la conferenza da pressa gi lieu en il vagun «Stiva grischuna».

«Guardar er en ils auters curtins»

Peter Loretz che presidiescha la Walservereinigung dal Grischun ha manegià ch'i saja bun che las singulas minoritads cumenzian a guardar «sur las saivs dals agens curtins ora» tge ch'ils vischins fetschian: «En l'avegnir daventan aaziuns cuminaivlas indispen-

blas, e la festa a Cazas è in bun exempel per quai.» *Agostini Priuli*, il vicepresidente da la Pro Grigioni Italiano (PGI), ha menziunà las bunas experientschas che lur organisaziun haja fatg avant dus onns en occasiun dal 90avel anniversari da la PGI a la Gehla a Cuira: «Blera glied da tuttas trais linguas era vegnida a sa scuntar cun nus, perquai essan nus stads immediatamain pronds da'ns participar a la festa Convivenza ils 16 october a Cazas.» Ils manaders dal project *Gianna Cadonau* ed *Andreas Gabriel* han preschentà il program da la Convivenza.

Multifariadad culturala en Grischun

Il di tematic che duai activar la convivenza ha lieu sco ch'els han ditg ils 16 october en l'Arena Grischuna a Cazas. A partir da las indesch fin a mesanotg datti in vast program. Durant l'avertura s'expriman *Claudio Lardi*, il president da la regenza grischuna, e cusseglier federal *Didier Burkhalter* davart la tematica «convivenza». «Siluenter pon las visitadras ed ils visitaders giudair sin duas tribunas in program cultural varià che preschenta la diversitad culturala grischuna», ha ditg *Gianna Cadonau*, «p. ex. in cabaret cun *Coni Allemann* alias *Bartli Valär*, in workshop per uffants cun *Annina Sedlacek* e *Roman Weishaupt* u in concert da *Manuela Tuena*.» Suenten in potpourri litterar chanta il Bündner Jugendchor sut la batgetta da *Martin Zimmermann* e la musi-

cista *Bianca Mayer* vegn a dar in concert. I dat er in saut cun costumes. «I duessan esser in per exempels da las bleras gruppas e furmaziuns culturalas che existan en Grischun», ha punctuà *Andreas Gabriel*, «senza vulair e pudair resguardar tut las valladas e regiuns grischunas medemamain.»

Discussiun en l'Arena

A las tschintg la saira èn tut ils interessads envidads da vegnir en l'Arena a tadlar la discussiun cun ils participants *Peter Loretz*, *Sacha Zala* che presidiescha la PGI e *Vincent Augustin*, il president da la LR. Lur tema è la dumonda «Convivenza – in mitus?». Suenten datti ina uschenumnada discussiun d'arena davart la dumonda «Co gartegia la convivenza da las culturas grischunas en noss chantun?». Suenten discussiuns e tschaina cumenza a las otg alura il grond finale da l'occurrenza trilingua: I vegnan a concertar la furmaziun *Quintinò*, *Corin Curschellas & Max Lässers* Überlandorchester e las *Liricas Anales*. Los Krüsimusig del fuego combinan lur concert cun ina represchentaziun dad art cun fiu. Musica datti er en ina lounge cun in DJ. «Tuts èn envidads da vegnir a Cazas a giudair la convivenza», ha concludì *Urs Cadruvi*.

La festa «Convivenza – gemeinsam en Grigioni» vegn realisada ils 16 october en l'Arena Grischuna a Cazas da las 11.00 fin a mesanotg. L'entrada è libra. Ulteriuras infurmaziuns: www.convivenza-gr.ch u tel. 081 258 32 22.



Ils partenaris *Agostino Priuli*, *Urs Cadruvi* e *Peter Loretz* (da san.) sa legran dala festa «convivenza» mez october a Cazas.